

Powšitkowne WOZJEWJENJA

njedźelu, 13. julija 2025

„Nóc tysac swěčkow“

Na zahrodźe klóštra Marijineje hwězdy w Pančicach-Kukowje dožiwja wopytowarjo sobotu, 19. julija, wot 19.00 hodź. zaso „Nóc tysac swěčkow“. Hač do zaswěćenja swěčkow poskića na jewišću pisany program, mjez druhim ze Smjerdžečanskej rejowanskej skupinu. Zastupne lisćiki su online na předań. Link k tomu je pod www.posol.de wozjewjeny.

Z busom do Krupki

Na putniku Božu mšu srjedu, 23. julija, w 10.00 hodź. w Krupce pojedže zaso bus. Štóz chcył sobu jěć, měł so w Radworskim Šmitec-Schwarzec wozydłownistwje přizjewić, telefonowe čisło (03 59 35) 28 60.

Swjata spowěď w Róžeńće

Wšitcy, kotřiž chcyli porciunkulski wotpusk zdobyć, maja w Róžeńće składnosć, sakrament swjateje spowědže přijěć, a to sobotu, 2. awgusta, wot 17.00 do 18.00 hodź. Spowědnicy budu fararjo Michał Anders, Gerat Wornar a dr. Michael Kleiner kaž tež kanonik Šćěpan Delan.

Wulět młodžiny – po Nysy čolmikować

Serbska dekanatna młodžina je na wulět přeprošena, kotryž budže njedźelu, 24. awgusta. Planowane je z busom do Deška pola Rózborka jěć a wottam po Nysy čolmikować. Wotjězd budže w 12.00 hodź. z Kulowa kaž tež z Chrósćic a potom wotpowědnje přizjewjenju po wsach. Plan nańdu zajimcy pod www.posol.de. Tam móža so hač do pjatka, 8. awgusta, přizjewić. Młodostni wróća so wokoło 19.00 hodź. z Rózborka, dóstanu pak do toho wječer, kotraž je z přinoškom za bus a zastup zapłaćena. Přenje džěćo w swójbje ma 25, druhe 20 a třeće 15 eurow za wulět zapłaćić.

Džěłarnička ikonografije „wobraz a słowo“ za młodostnych

Młodostni, maće lóšt na workshop, wulět a wuměnu z pólskimi młodostnymi? To wšitko móžeće wot pjatka do soboty, 19. do 20. septembra, w „Domje Gerharta Hauptmanna“ w Jelenjej Górze dožiwić. Čehodla džěłarnička ikonografije? Pisanje ikonow słuša k rědkim wumělstwam. Ikona je uniwersum, wobstejacy z mnohich tradicijow a technikow, kotrež buchu wot generacije ke generaciji na wšelakich městnach a we wšelakich nabožinach dale dawane a hač do džensnišeho posrědkowane. Tuž budžće wotewrjeni a wćipni za nowe impulsy a kulturnu wuměnu mjez młodostnymi. Při přizjewjenju pod sekretariat@sorbisches-museum.de maće mjeno, adresu, starobu a swoje telefonowe čisło podać. Interreg Pólska-Sakska a Euroregion Nysa projekt spěchujetej. Tohodla směće so jako młodostni darmotnje wobdźělić. Wjace informacijow nańdžće na stronje Serbskeho muzeja www.sorbisches-museum.de.

Ekumeniski nyšpor w klóštrje

Křesćansko-socialny kubłanski skutk z.t. přeprošuje zhromadnje z klóštrom Marijinej hwězdu na zelowu njedźelu do Zežiwjenskeho a zeloweho centruma w Pančicach-Kukowje. Na hosći čaka njedźelu, 17. awgusta, pisany program. Zakónčacy ekumeniski nyšpor ze žohnowanjom zelow budže w 17.00 hodź.

Dekanatny dzeń w Róžeńće

Wšitcy wěriwi su sobotu, 23. awgusta, na zhromadny dzeń Budyskeho dekanata pod hesłom „Marija – znamjo nadźije“ do Róžanta přeprošeni. Liturgiske zahajenje budže w 15.00 hodź. z wustajenjom Najswećešeho w putniskej cyrkwi. Hižo wot 14.00 hodź. poskićuja wosady kofej, jeli to same organizuja, dokelž so zahe na puć podadža. Štóž chce, móže piknikować. Wot 16.00 do 18.00 hodź. změja zamołwići pisany program wokoło cyrkwy spřihotowany, mjez druhim slackline – to je balansowanje na šěrokim pasu –, hry ze zmauwacym so rubiškom, paslenje, hermark a džěcacy program. W cyrkwi móža wopytowarjo na hudźbu sluchać. Nimo toho budže tam přiležnosť, sakrament wujednanja w swjatej spowědži přijimać, abo spowědnu rozmołwu wjesć. Dekanatny dzeń skónči so z Božej mšu we 18.00 hodź. w Róžeńčanskej swjatnicy. Tón dzeń předwječorne kemše w serbskich wosadach njebudu.

Ministrantska kopańca

Koparski turněr ministrantow ze serbskich wosadow budže sobotu, 30. awgusta, w Pěškecach. Započatk je w 9.00 hodź. z Božej mšu we wjesnej kapałce.

Gig-festiwal w Róžeńće

Lětuši Gig-festiwal je wot pjatka do njedźele, 15. do 17. awgusta, w Róžeńće planowany. Program kaž tež přehlad wobdźělnikow stej na internetowej stronje festiwala wozjewjenej. Link na nju je pod www.posol.de podaty.

Dworowy swjedzeń w Hrubjelčicach

Serbske ewangelske towarstwo a Maćijec swójba přeprošujetej wšitkich Serbow a dalšich zajimcow na lětnje pućowanje a serbski swjedzeń sobotu, 16. awgusta. Započatk je w 14.00 hodź. na Jaworkec/Maćijec dworje w Hrubjelčicach, Čěchorčanska 16. Wottam podadža so wobdźělnicy na pućowanje k pomnikej Marije Simonoweje w Dobruši a dale na hrodžišćo wsy. Po swačinje na dworje přizamknjetej so tam w 17.00 hodź. serbska ekumeniska nutrnosť z dekanom Witom Šćapanom a Serbskim superintendentom Krystofom Rummelom kaž tež program ze skupinu Fünf an der Feier. W bróžni budže bifej z jědzemi přihotowany. Štóž chce k bifejej přinošować, njech něšto sobu přinjese. Přeprošeni su tež wšitcy, kotřiž chcedža hakle na nutrnosť abo program přińć. Při sylnym dešču započnje so swjedzeń w 17.00 hodź. w Maćijec bróžni.